

Berita Harian Mei 2020

Bil.	Tarikh	Tajuk Berita	Catatan	Muka Surat
1	Jumaat 1 Mei 2020	Tangguh pelaksanaan undang-undang liabiliti korporat	Suruhanjaya Pencegahan Rasuah Malaysia (SPRM)	3
2	Rabu 6 Mei 2020	Kes Shahrir Samad dijadual semula 15 Mei	Suruhanjaya Pencegahan Rasuah Malaysia (SPRM)	5
3	Selasa 12 Mei 2020	Perbicaraan 1MDB Najib akan disambung selepas Parlimen bersidang	1Malaysia Development Bhd (1MDB)	7
4	Selasa 12 Mei 2020	Anak tiri Najib dilepas tanpa dibebaskan	1Malaysia Development Bhd (1MDB)	9
5	Isnin 18 Mei 2020	Muhyiddin tak terbabit keputusan bebaskan Riza Aziz	1Malaysia Development Bhd (1MDB)	12
6	Selasa 19 Mei 2020	Permohonan Ahmad Maslan batalkan tuduhan didengar 19 Jun	Suruhanjaya Pencegahan Rasuah Malaysia (SPRM),	15
7	Selasa 19 Mei 2020	Mahkamah benar kerajaan sita wang tunai milik Riza Aziz	Suruhanjaya Pencegahan Rasuah Malaysia (SPRM)	17
8	Selasa 19 Mei 2020	Ada isu tidak direkod elak serangan terhadap Najib	1Malaysia Development Bhd (1MDB)	19
9	Rabu 20 Mei 2020	Bicara kes rasuah Rosmah bermula 13 Julai	Suruhanjaya Pencegahan Rasuah Malaysia (SPRM)	21
10	Rabu 20 Mei 2020	Sambung bicara kes Najib dan Arul Kanda, 15 Jun	1Malaysia Development Bhd (1MDB)	23
11	Rabu 20 Mei 2020	Latar belakang rakan bapa Jho Low tidak diperiksa - Saksi	1Malaysia Development Bhd (1MDB)	25
12	Khamis 21 Mei 2020	Permohonan gantung perintah kembalikan RM194 juta kepada UMNO, MCA didengar 19 Jun	Suruhanjaya Pencegahan Rasuah Malaysia (SPRM)	27

Bil.	Tarikh	Tajuk Berita	Catatan	Muka Surat
13	Khamis 21 Mei 2020	'Saya yakin 100 peratus dengan Jho Low'	1Malaysia Development Bhd (1MDB)	29
14	Khamis 21 Mei 2020	Pengurusan tidak pernah lihat akaun PSOSL	1Malaysia Development Bhd (1MDB)	31
15	Khamis 21 Mei 2020	Gagal isytihar RM1 juta kepada LHDN, Shahrir Samad akan kemuka representasi	Suruhanjaya Pencegahan Rasuah Malaysia (SPRM)	33
16	Sabtu 23 Mei 2020	COVID-19: JAN sahkan memo	KETUA Audit Negara	35
17	Selasa 26 Mei 2020	Bekas pegawai bank dibicara berhubung pemindahan AS\$700 juta daripada 1MDB ke Jho Low	1Malaysia Development Bhd (1MDB)	37
18	Jumaat 29 Mei 2020	Kes Najib: Pembelaan mula hujahan Isnin ini	SRC International Sdn Bhd	39
19	Jumaat 29 Mei 2020	COVID-19: Ujian saringan kontak rapat Ketua Audit Negara negatif	Ketua Audit Negara	42
20	Ahad 31 Mei 2020	Hujahan pembelaan kes SRC esok	SRC International Sdn Bhd	43



PRESIDEN Persatuan Pemeriksa Fraud Bertauliah Malaysia,

1. Tangguh pelaksanaan undang-undang liabiliti korporat

KUALA LUMPUR: Suruhanjaya Pencegahan Rasuah Malaysia (SPRM) perlu menangguhkan pelaksanaan undang-undang liabiliti korporat yang mewajibkan syarikat menyelaraskan prosedur berkaitan langkah pencegahan rasuah mulai bulan depan.

Presiden Persatuan Pemeriksa Fraud Bertauliah Malaysia, Datuk Seri Akhbar Satar, berkata peruntukan baharu dalam Akta SPRM 2009 itu perlu dipanjang setahun lagi bagi memberi masa yang cukup kepada syarikat korporat di negara ini.

Katanya, penularan wabak COVID-19 mempengaruhi dan menjelaskan perniagaan untuk berhubung antara satu sama lain.

"Banyak syarikat korporat yang terjejas oleh COVID-19 ini, malah ada yang terpaksa ditutup dan kebanyakannya kini memberi tumpuan kepada kelangsungan untuk terus beroperasi.

"Selain itu, bagi syarikat besar sukar melaksanakannya dalam waktu yang singkat kerana ia memakan masa, lebih lagi dalam memenuhi prosedur kerangka kerja seperti yang ditetapkan oleh undang undang itu terutama sekali langkah yang mencukupi bagi pematuhan," katanya dalam satu kenyataan, hari ini.

Undang-undang liabiliti korporat bakal dikuatkuasakan Jun ini berdasarkan Seksyen 17(A) Akta SPRM 2009 (Pindaan 2018) yang diluluskan oleh Parlimen pada 5 April 2018.

Seksyen itu antara lain menyatakan peruntukan mengenai liabiliti korporat berkaitan rasuah oleh sesebuah syarikat, pengarah, rakan kongsi, pegawai atau pengurusnya.

Jika sabit kesalahan ia boleh dihukum denda tidak kurang daripada 10 kali jumlah suapan atau penjara tidak melebihi 20 tahun.

Bagaimanapun organisasi korporat boleh membela diri jika dapat menunjukkan bahawa mereka mempunyai "prosedur yang mencukupi" dalam operasinya.

Akhbar berkata, penangguhan pelaksanaan peraturan itu dapat memberi masa yang cukup kepada syarikat korporat supaya bersedia melaksanakannya.

Katanya, berdasarkan tinjauan kajian penilaian yang dilakukan oleh Institut Tadbir Urus Korporat (MICG) terhadap 100 syarikat tersenarai teratas di Malaysia berkaitan 13 aspek program antirasuah mendapati, hanya 13 syarikat yang mencapai skor lebih daripada 90 peratus pada tahun lalu./

"Skor purata ialah 62 peratus dan rata-rata syarikat masih dalam keadaan penyelesaian untuk langkah pmatuhan pada kadar 54 peratus.

"Ini bermakna masih banyak lagi syarikat yang belum mampu melaksanakan tanggungjawab ini terutama sekali syarikat yang besar," katanya.

Dalam masa yang sama beliau menyatakan penangguhan itu membolehkan SPRM berpeluang mengkaji balik peruntukan yang sedia ada untuk menambah baik supaya ia seiring dengan amalan yang dipraktikkan di negara lain, terutama United Kingdom dan Singapura.

Beliau turut mencadangkan klausu Perjanjian Penangguhan Pendakwaan (DPA) di dalam Seksyen 17A Akta SPRM dimasukkan supaya akta itu dapat dikuat kuasa dengan lebih berkesan.

"DPA ini juga memberi peluang kepada syarikat untuk berunding dalam membayar denda," katanya.

**BEKAS pengerusi Felda Tan Sri Shahrir Abdul Samad****2. Kes Shahrir Samad dijadual semula 15 Mei**

KUALA LUMPUR: Kes bekas pengerusi Felda Tan Sri Shahrir Abdul Samad yang didakwa gagal mengisyiharkan RM1 juta yang diterima daripada Datuk Seri Najib Razak kepada Lembaga Hasil Dalam Negeri (LHDN), dijadualkan semula pada 15 Mei untuk pengurusan kes, di Mahkamah Sesyen di sini.

Peguam Syahrul Syazwan Salehin yang mewakili Shahrir memberitahu Bernama, ia susulan lanjutan tempoh Perintah Kawalan Pergerakan yang diumumkan oleh kerajaan baru-baru ini.

Mahkamah sebelum ini menetapkan Isnin lalu untuk pengurusan kes berkenaan.

Ditanya sama ada pihaknya merancang untuk mengemukakan representasi kepada Jabatan Peguam Negara berhubung pertuduhan yang dihadapi anak guamnya atau memfailkan permohonan bagi membatalkan pertuduhan itu, Syahrul Syazwan berkata pihaknya akan berbincang dengan anak guam selepas pihak pendakwaan menyerahkan sepenuhnya dokumen kepada mereka.

"Pihak pendakwaan masih lagi belum menyerahkan sepenuhnya dokumen kepada kami. Bila dokumen telah diserahkan sepenuhnya pihak kami akan berbincang dengan anak guam untuk tindakan selanjutnya," katanya menerusi aplikasi WhatsApp.

Timbalan Pendakwa Raya Mohd 'Afif Ali ketika dihubungi memaklumkan pihaknya akan menyerahkan beberapa dokumen tambahan kepada pihak pembelaan pada tarikh pengurusan kes berkenaan.

Shahrir, 71, dituduh membabitkan diri dalam pengubahan wang haram dengan cara tidak melaporkan pendapatan sebenar di dalam Borang Nyata Cukai Pendapatan bagi Tahun Taksiran 2013 yang bertentangan dengan Seksyen 113(1)(a) Akta Cukai Pendapatan 1967, iaitu tidak mengisyiharkan

pendapatan yang diterima daripada Najib berjumlah RM1 juta melalui sekeping cek AmIslamic Bank Berhad bertarikh 27 November 2013.

Cek itu kemudianya dimasukkan ke dalam akaun Public Islamic Bank milik tertuduh pada 28 November 2013.

Oleh itu, Shahrir didakwa membabitkan diri secara langsung dalam transaksi hasil daripada sesuatu aktiviti haram dan dituduh melakukan kesalahan di LHDN, Cawangan Duta, Kompleks Pejabat Kerajaan, Jalan Tuanku Abdul Halim di sini pada 25 April, 2014.

Pertuduhan ke atas beliau adalah mengikut Seksyen 4(1) Akta Pencegahan Pengubahan Wang Haram dan Pencegahan Pembiayaan Keganasan 2001 yang memperuntukkan hukuman denda tidak melebihi RM5 juta atau penjara maksimum lima tahun atau kedua-duanya jika sabit kesalahan.



Bekas Perdana Menteri, Datuk Seri Najib Razak

3. Perbicaraan 1MDB Najib akan disambung selepas Parlimen bersidang

KUALA LUMPUR: Perbicaraan kes Datuk Seri Najib Razak yang menghadapi pertuduhan rasuah dan pengubahan wang haram membabitkan RM2.3 bilion dana 1Malaysia Development Berhad (1MDB), yang dijadual 18 Mei, ditangguh kepada kesokan hari.

Ini bagi membolehkan bekas Perdana Menteri itu menghadiri sidang sehari Dewan Rakyat.

Timbalan Pendakwa Raya, Ahmad Akram Gharib, berkata peguam Najib, Tan Sri Muhammad Shafee Abdullah menghantar emel kepada Mahkamah Tinggi pada Jumaat lalu untuk memohon tarikh baharu itu.

"Permohonan pihak pembela telah diluluskan dan perbicaraan akan bersambung pada 19 Mei, jam 2 petang," katanya.

Perbicaraan itu yang mendapat liputan meluas menjalani prosiding terakhir pada 13 Mac di hadapan Hakim Collin Lawrence Sequerah.

Mahkamah sebelum itu menetapkan 19-20 Mac, 23-27 Mac dan 30-31 Mac; 1-30 April; dan 4-8 Mei, 11-22 Mei termasuk Jumaat untuk meneruskan perbicaraan itu.

Tarikh lain yang ditetapkan ialah seluruh Jun, Julai, Ogos, September dan Oktober termasuk Jumaat.

Namun, prosiding itu telah ditangguhkan beberapa kali susulan pelaksanaan Perintah Kawalan Pergerakan oleh kerajaan.

Apabila perbicaraan disambung semula, peguam bela Najib dijangka akan meneruskan soal balas saksi kesembilan pendakwaan iaitu bekas Ketua Pegawai Eksekutif 1MDB, Datuk Shahrol Azral Ibrahim Halmi, yang menjadi saksi sejak 23 September tahun lalu.

Najib, 67, berhadapan dengan empat pertuduhan menyalahguna kedudukannya untuk memperoleh gratifikasi berjumlah RM2.3 bilion dana 1MDB dan 21 pertuduhan pengubahan wang haram membabitkan wang yang sama.



Anak tiri bekas Perdana Menteri, Datuk Seri Najib Razak, Riza Shahriz Abdul Aziz

4. Anak tiri Najib dilepas tanpa dibebaskan

KUALA LUMPUR: Anak tiri Datuk Seri Najib Razak, Riza Shahriz Abdul Aziz, dilepas tanpa dibebaskan oleh Mahkamah Sesyen di sini, hari ini, atas tuduhan pengubahan wang haram US\$248 juta (RM1.25 bilion) berkaitan penyelewengan dana 1Malaysia Development Berhad (1MDB).

Hakim Azman Ahmad membuat keputusan itu selepas pihak pendakwaan dan tertuduh mencapai persetujuan melalui representasi yang dikemukakan kepada Pejabat Peguam Negara.

Hari ini sepatutnya dijadualkan bagi pengurusan kes terbabit.

Bagaimanapun, Timbalan Pendakwa Raya, Datuk Seri Gopal Sri Ram yang mewakili pendakwaan, membacakan kenyataan kepada mahkamah, bahawa sejak tertuduh didakwa, beliau sudah beberapa kali mengemukakan permohonan representasi.

Sri Ram berkata, selepas representasi itu diteliti dan dipertimbangkan, beberapa keputusan berjaya dicapai.

Katanya, melalui terma yang dipersetujui oleh kedua-dua belah pihak, Kerajaan Persekutuan akan menerima sejumlah wang bernilai jutaan ringgit.

"Jumlah wang terbabit adalah merujuk kepada perkara utama dalam pertuduhan yang dikenakan dalam kes ini...tertuduh sepanjang proses ini menerima perwakilan perundangan yang kompeten dan mencukupi.

"Kesan daripada persetujuan itu, pertuduhan yang dikenakan ke atas tertuduh tidak akan diteruskan sementara menunggu terma persetujuan itu dilaksanakan sepenuhnya.

"Pihak pendakwaan melalui keizinan tertuduh dengan ini memohon perintah daripada mahkamah untuk melepas tanpa membebaskan tertuduh," katanya.

Sri Ram berkata, jika berpuas hati dengan pelaksanaan persetujuan itu, tindakan akan diambil supaya tertuduh dilepas dan dibebaskan.

Katanya, bagaimanapun jika tidak berpuas hati dengan pelaksanaan persetujuan itu, pendakwaan berhak untuk mengembalikan pertuduhan dan mendakwa tertuduh.

Selepas membacakan kenyataan itu, Azman kemudian melepas dan membebaskan tertuduh dan mengarahkan wang jaminan RM1 juta dengan dua penjamin dikembalikan.

Pada 5 Julai tahun lalu, Riza, 43, pemilik syarikat Red Granite Pictures, mengaku tidak bersalah terhadap lima pertuduhan.

Bagi pertuduhan pertama, penerbit filem *The Wolf of Wall Street* itu didakwa membabitkan diri dalam pengubahan wang haram iaitu menerima hasil daripada aktiviti haram berjumlah US\$1.173,104 melalui satu transaksi pemindahan wang daripada akaun milik Good Star Limited di RBS Coutts, Zurich, Switzerland ke akaun City National Bank, Los Angeles, AS milik Red Granite Productions Inc.

Wang berkenaan didakwa hasil penyelewengan dana 1MDB.

Dia dituduh melakukan kesalahan itu antara 12 April dan 12 Mei 2011 di City National Bank, Los Angeles Main, Amerika Syarikat.

Riza, anak Datin Seri Rosmah Mansor hasil perkahwinan terdahulu, dituduh melakukan kesalahan sama membabitkan US\$9 juta melalui transaksi pemindahan wang daripada akaun serupa pada 10 September, 2012 dan 10 Oktober, 2012 di tempat sama.

Bagi pertuduhan ketiga dan keempat, dia didakwa melakukan perbuatan sama membabitkan jumlah US\$133 juta dan US\$60 juta melalui satu transaksi pemindahan wang daripada akaun milik Aabar Investment PJS Limited di BSI SA, Lugano, Switzerland ke akaun BSI Bank Limited Singapura milik Red Granite Capital Ltd.

Dia dituduh melakukan kesalahan itu di BSI Ltd, Singapura pada 18 Jun, 2012 dan 23 Oktober, 2012.

Mengikut pertuduhan kelima, tertuduh didakwa melakukan kesalahan serupa membabitkan jumlah US\$45 juta di tempat sama pada 14 November, 2012.

Pertuduhan mengikut Seksyen 4(1) (a) Akta Pencegahan Pengubahan Wang Haram, Pencegahan Pembiayaan Keganasan dan Hasil daripada Aktiviti Haram 2001 dan boleh dihukum mengikut Seksyen 4(1) akta sama, jika sabit kesalahan, Riza boleh didenda maksimum RM5 juta atau penjara maksimum lima tahun atau kedua-duanya.



Mahkamah Sesyen Kuala Lumpur pada 14 Mei lalu melepas tanpa membebaskan anak tiri Datuk Seri Najib Razak, Riza Aziz, (kanan) berhubung pertuduhan pengubahan wang haram AS\$248 juta (RM1.25 billion) berkaitan penyelewengan dana 1MDB

5. Muhyiddin tak terbabit keputusan bebaskan Riza Aziz

KUALA LUMPUR: Perdana Menteri, Tan Sri Muhyiddin Yassin menegaskan bahawa beliau tidak terbabit dalam persetujuan melepas tanpa membebaskan Riza Shahriz Abdul Aziz yang juga anak tiri Datuk Seri Najib Razak daripada pertuduhan pengubahan wang haram berkaitan penyelewengan dana 1Malaysia Development Berhad (1MDB).

Pejabat Perdana Menteri menerusi kenyataan sebaliknya menjelaskan keputusan itu dicapai bersandarkan persetujuan antara pihak pendakwaan dan tertuduh melalui representasi yang dikemukakan Pejabat Peguam Negara.

"Perdana Menteri mengulangi pendiriannya untuk tidak mencampuri urusan Pejabat Peguam Negara dan badan kehakiman dalam membuat apa-apa keputusan berkaitan kes-kes jenayah di negara ini, termasuk kes-kes berprofil tinggi," katanya dalam kenyataan itu hari ini.



Kenyataan media Pejabat Perdana Menteri.

Media sebelum ini melaporkan Riza dilepas tanpa dibebaskan oleh Mahkamah Sesyen atas tuduhan pengubahan wang haram membabitkan AS\$248 juta (RM1.25 bilion) berkaitan penyelewengan dana 1MDB.

Hakim Azman Ahmad membuat keputusan itu selepas pihak pendakwaan dan pembelaan mencapai persetujuan melalui representasi yang dikemukakan kepada Pejabat Peguam Negara.

Menerusi persetujuan representasi itu, Malaysia dijangka menerima aset luar negara bernilai RM465.3 juta (AS\$107.3 juta).

Bagaimanapun, bekas Peguam Negara, Tan Sri Tommy Thomas dalam satu kenyataan menafikan beliau terbabit dalam isu melepaskan tanpa membebaskan Riza daripada pertuduhan.

Tommy turut menafikan dakwaan Suruhanjaya Pencegahan Rasuah Malaysia (SPRM) sebelum ini bahawa beliau membuat pertimbangan dan memberikan persetujuan untuk melepas tanpa membebaskan Riza.

Peguam Negara, Tan Sri Idrus Harun, semalam pula dilaporkan berkata Tommy secara prinsip bersetuju dengan cadangan representasi bagi mengkaji semula pertuduhan berhubung pengubahan wang haram terhadap Riza.

Idrus menjelaskan Timbalan Pendakwa Raya Kanan, Datuk Seri Gopal Sri Ram selepas berbincang dengan Ketua Pesuruhjaya SPRM ketika itu, Latheefa Koya, turut mencadangkan supaya cadangan dalam representasi berkenaan diterima oleh SPRM.



Ahli Parlimen Pontian, Datuk Seri Ahmad Maslan

6. Permohonan Ahmad Maslan batalkan tuduhan didengar 19 Jun

KUALA LUMPUR: Permohonan Ahli Parlimen Pontian, Datuk Seri Ahmad Maslan, untuk membatalkan pertuduhan gagal mengisytiharkan RM2 juta yang diterima daripada Datuk Seri Najib Razak kepada Lembaga Hasil Dalam Negeri (LHDN) dan memberi pernyataan palsu kepada Suruhanjaya Pencegahan Rasuah Malaysia (SPRM), akan didengar 19 Jun ini.

Timbalan Pendakwa Raya, Siti Noor Hafizan Zakaria, memberitahu BERNAMA tarikh baharu itu menerusi mesej aplikasi WhatsApp.

"Pada 12 Mei lalu, pihak mahkamah menghubungi pihak pendakwaan dan peguam untuk memaklumkan tarikh baharu bagi mendengar permohonan itu.

"Mahkamah menetapkan 19 Jun ini bagi mendengar permohonan tertuduh dan untuk pengurusan kes," katanya.

Beliau berkata mahkamah sebelum ini menetapkan 12 Jun untuk mendengar permohonan dan pengurusan kes berkenaan namun tarikh itu telah ditukar.

Pada 21 Januari lalu, Ahmad, 54, mengaku tidak bersalah atas dua pertuduhan, iaitu gagal mengisytiharkan RM2 juta yang diterima daripada Najib pada 2013 kepada LHDN, dan memberi pernyataan palsu kepada SPM, tahun lalu.

Bagi pertuduhan pertama, Ahmad didakwa membabitkan diri dalam pengubahan wang haram dengan cara tidak melaporkan RM2 juta yang diterima daripada Najib dalam pendapatan sebenarnya kepada LHDN dalam Borang Nyata Cukai Pendapatan Bagi Tahun Taksiran 2013, yang bertentangan dengan Seksyen 113(1)(a) Akta Cukai Pendapatan 1967.

Bekas Timbalan Menteri Kewangan itu didakwa menerima wang itu daripada Najib, yang dipercayai sebagai hasil aktiviti yang menyalahi undang-undang, melalui cek AmIslamic Bank Berhad bertarikh 27 November 2013, dan cek itu telah ditunaikan sendiri oleh Ahmad, pada hari yang sama.

Kesalahan itu didakwa dilakukan di LHDN Cawangan Duta, Kompleks Pejabat Kerajaan, Jalan Tuanku Abdul Halim pada 30 April 2014.

Pertuduhan dikemukakan mengikut Seksyen 4(1)(a) Akta Pencegahan Pengubahan Wang Haram dan Pencegahan Pembiayaan Keganasan 2001, yang membawa hukuman denda tidak melebihi RM5 juta atau penjara maksimum lima tahun atau kedua-duanya, jika sabit kesalahan.

Bagi pertuduhan kedua, Ahmad dituduh memberi penyataan palsu kepada SPRM ketika percakapannya dirakam oleh pegawai penyiasat SPRM iaitu Ketua Penolong Kanan Pengguna Mohd Zairi Zainal, berhubung isu itu di bilik sidang media, Bangunan Parlimen, Jalan Parlimen, di sini antara 2.45 petang hingga 3.30 petang pada 4 Julai 2019.

Pertuduhan itu dibuat mengikut Seksyen 32(8)c) Akta Pencegahan Pengubahan Wang Haram dan Pencegahan Pembiayaan Keganasan 2001, yang membawa hukuman denda tidak melebihi RM3 juta atau penjara maksimum lima tahun atau kedua-duanya, jika sabit kesalahan.



Riza Shahriz Abdul Aziz

7. Mahkamah benar kerajaan sita wang tunai milik Riza Aziz

KUALA LUMPUR: Mahkamah Tinggi di sini, hari ini, membenarkan wang tunai berjumlah kira-kira RM600 juta milik Riza Shahriz Abdul Aziz yang juga anak tiri Datuk Seri Najib Razak dilucut hak kepada kerajaan.

Hakim Mohamed Zaini Mazlan membuat keputusan itu selepas membenarkan permohonan Suruhanjaya Pencegahan Rasuah Malaysia (SPRM) melucut hak terhadap wang tunai dalam pelbagai mata wang yang sebelum ini disita di kediaman keluarga Riza di Langgak Duta.

Terdahulu, Timbalan Pendakwa Raya, Faten Hadni Khairuddin, memberitahu mahkamah, Riza selaku responden ketiga, bersetuju wang tunai berjumlah RM537,000, GBP2,700 dan Rupee Sri Lanka 2.87 juta yang dirampas pada 17 Mei 2018 dilucut hak kepada kerajaan.

Faten Hadni berkata, susulan penyelesaian melepas tanpa membebaskan yang dicapai di Mahkamah Sesyen minggu lalu, Riza bersetuju item yang disita pihak berkuasa Malaysia atau Amerika Syarikat dilucutkan hak.

"Bagaimanapun, mohon direkodkan daripada responden pertama dan kedua, Datuk Seri Najib Razak dan isterinya, Datin Seri Rosmah Mansor, tiada tuntutan akan dibuat terhadap harta yang disita," katanya.

Peguam Syahirah Hanapiah dan Azrul Zulkifli Stork, masing-masing mewakili Najib dan Rosmah, mengesahkan tiada tuntutan atas harta sitaan.

Sementara itu, mahkamah turut menetapkan 24 Ogos ini untuk perbicaraan kes pelucutan hak barang yang dikemukakan kerajaan terhadap Najib, keluarganya dan beberapa yang lain.

Mahkamah menetapkan tarikh itu ketika kes ditetapkan untuk pengurusan kes.

Pada 3 Februari lalu, mahkamah membenarkan permohonan oleh Najib, Rosmah dan anak perempuan mereka, Nooryana Najwa, memeriksa secara fizikal barang yang disimpan di peti besi di Bank Negara Malaysia (BNM).

Mohamed Zaini memerintahkan pendakwa raya membenarkan Najib dan ahli keluarganya memeriksa secara fizikal barang berkenaan dan memutuskan mereka perlu diberi peluang untuk memeriksa barang yang disita itu.

Najib memfailkan notis usul pada 18 Julai 2019 atas alasan sebahagian daripada kandungan kotak-kotak, beg serta bekas simpanan yang menjadi sebahagian daripada harta alih yang dirampas telah dikeluarkan daripada bungkus asalnya dan ia menyebabkan kekeliruan bagi membuat pengecaman terhadap harta alih berkenaan.

Rosmah dan Nooryana Najwa pula mengemukakan permohonan sama pada 19 Julai 2019 bagi mendapatkan butiran lengkap dan memeriksa barang yang disita.

Antara barang yang dinyatakan dalam kedua-dua notis itu ialah 315 beg tangan pelbagai jenama, 14 utas jam tangan dan 27 pasang kasut pelbagai jenama serta wang tunai pelbagai mata wang asing antaranya wang tunai RM537,000, Pound Sterling 2,700, Rupee Sri Lanka 2,870,000, wang lama Ringgit Malaysia RM187,750 dan Pound Sterling 320,500.



Bekas Perdana Menteri, Datuk Seri Najib Razak, hadir ke mahkamah bagi perbicaraan kes rasuah dan pengubahan wang haram dana 1MDB di Mahkamah Tinggi Kuala Lumpur.

8. 'Ada isu tidak direkod elak serangan terhadap Najib'

KUALA LUMPUR: Mahkamah Tinggi hari ini diberitahu, beberapa perkara yang dibincang dalam Mesyuarat Lembaga Pengarah 1Malaysia Development Berhad (1MDB) tidak direkodkan supaya tidak digunakan sebagai 'peluru tambahan' dalam serangan politik ke atas Datuk Seri Najib Razak.

Bekas Ketua Pegawai Eksekutif (CEO) 1MDB, Datuk Shahrol Azral Ibrahim Halmi, berkata Ahli Lembaga Pengarah berkongsi pandangan untuk sentiasa berhati-hati terhadap apa yang dimasukkan dalam minit mesyuarat.

Beliau yang juga saksi pendakwaan kesembilan berkata, ia bagi mengelak daripada wujud isu digunakan terhadap Najib.

Shahrol Azral berkata demikian ketika menjawab soalan balas peguam Najib, Tan Sri Muhammad Shafee Abdullah, jika beliau ada memaklumkan kepada Lembaga Pengarah mengenai kesukaran mendapatkan dokumen 1MDB untuk diaudit oleh firma audit Ernst & Young (EY).

Peguam bertanyakan soalan itu berikutan ada beberapa item yang tidak direkodkan dalam minit mesyuarat.

Ditanya mengapa EY tidak bertahan lama sebagai juruaudit 1MDB, Shahrol Azral berkata, pada 2009 melalui Laporan Jawatankuasa Kira-Kira Wang Negara (PAC), berlaku perselisihan faham mengenai terma penilaian syarikat usaha sama 1MDB-PSI (PetroSaudi International) JV ke dalam pernyata kewangan syarikat.

Shahrol Azral tidak mengingati siapa yang memberikan idea untuk tidak melanjutkan perkhidmatan EY, bagaimanapun menegaskan ia bukan datang daripadanya.

Menurut saksi itu, ada cadangan menggantikan firma audit itu dengan KPMG dan tidak menolak kemungkinan ia daripada ahli perniagaan dalam buruan, Low Taek Jho atau lebih dikenali sebagai Jho Low.

Katanya, beliau pernah membangkitkan mengenai isu kesukaran mendapatkan dokumen kepada Najib, bagaimanapun perkara itu tidak direkodkan.

"Saya dan bekas Pengurus 1MDB, Tan Sri Lodin Wak Kamaruddin, membawa perkara itu kepada pejabat PM (Perdana Menteri) antara tahun 2009 dan 2010," katanya.

Muhammad Shafee kemudian mencadangkan saksi selaku CEO cuba menyembunyikan isu yang dibangkitkan EY dengan menukar syarikat audit, namun Shahrol Azral menafikan cadangan peguam itu.



Perbicaraan kes rasuah isteri bekas Perdana Menteri, Datin Seri Rosmah Mansor, ditetapkan bermula 13 Julai depan

9. Bicara kes rasuah Rosmah bermula 13 Julai

KUALA LUMPUR: Perbicaraan kes rasuah Datin Seri Rosmah Mansor berhubung pembekalan dan pemasangan sistem tenaga solar di 369 sekolah di Sarawak, akan bersambung selama 31 hari di Mahkamah Tinggi di sini bermula 13 Julai depan.

Hakim Mohamed Zaini Mazlan menetapkan tarikh itu selepas Timbalan Pendakwa Raya, Poh Yih Tinn, memaklumkan bahawa pihak terbabit telah berbincang tarikh yang sesuai untuk perbicaraan kes berkenaan.

Tarikh perbicaraan yang ditetapkan ialah 13 sehingga 16 Julai; 3 hingga 6 Ogos; 17 hingga 19 Ogos; 7 hingga 10 September; 14 hingga 17 September; 5 hingga 8 Oktober; 2 hingga 5 November dan 16 hingga 19 November.

Perkara itu turut disahkan peguam Datuk Akberdin Abdul Kadir mewakili Rosmah, yang dikecualikan hadir ke mahkamah hari ini.

Yih Tinn berkata, pihak pendakwaan akan memanggil sembilan lagi saksi untuk memberi keterangan dalam perbicaraan kes itu dan tiga lagi penyataan saksi akan diserahkan kepada pihak pembelaan hujung bulan ini.

Setakat ini, 12 saksi pendakwaan telah memberi keterangan dan apabila perbicaraan bersambung pada 13 Julai, pihak pembelaan akan meneruskan dengan pemeriksaan balas terhadap saksi ke-12, bekas Ketua Setiausaha Kementerian Pendidikan, Datuk Seri Alias Ahmad.

Sebelum ini, mahkamah menetapkan 9 hingga 11 Jun, 6 hingga 9 Julai, 13 hingga 16 Julai dan 20 hingga 23 Julai untuk menyambung perbicaraan kes berkenaan.

Rosmah, 68, berdepan satu pertuduhan meminta RM187.5 juta dan dua pertuduhan menerima suapan RM6.5 juta daripada Pengarah Urusan Jepak Holdings, Saidi Abang Samsudin, menerusi bekas pembantu Rosmah, Datuk Rizal Mansor, sebagai upah membantu Jepak Holdings mendapatkan Projek Bersepadu Sistem Solar Photovoltaic (PV) Hibrid serta Penyelenggaraan dan Operasi Genset/Diesel bagi 369 sekolah luar bandar Sarawak secara rundingan terus daripada Kementerian Pendidikan.

Perbuatan itu didakwa dilakukan di Lygon Cafe, Sunway Putra Mall, Jalan Putra, di sini; kediamannya di Jalan Langgak Duta, Taman Duta dan di Seri Perdana, Persiaran Seri Perdana, Putrajaya antara Januari 2016 dan 7 September 2017.

Isteri bekas Perdana Menteri, Datuk Seri Najib Razak itu didakwa mengikut Seksyen 16(a)(A) Akta Suruhanjaya Pencegahan Rasuah Malaysia 2009 yang boleh dikenakan hukuman penjara maksimum 20 tahun dan denda tidak kurang lima kali ganda jumlah atau nilai suapan atau RM10,000, mengikut mana yang lebih tinggi, jika sabit kesalahan.

Rosmah sebelum ini sepatutnya dibicarkan bersama Rizal, yang menghadapi empat pertuduhan meminta dan menerima rasuah bagi pihak Rosmah berhubung projek berkenaan.

Namun pada 8 Januari lalu, mahkamah melepas dan membebaskan Rizal daripada pertuduhan itu selepas pihak pendakwaan menarik balik semua pertuduhan.



10. Sambung bicara kes Najib dan Arul Kanda, 15 Jun

KUALA LUMPUR: Mahkamah Tinggi di sini hari ini menetapkan selama 15 hari bermula 15 Jun depan untuk menyambung perbicaraan kes pindaan Laporan Akhir Pengauditan 1Malaysia Development Berhad (1MDB) membabitkan bekas Perdana Menteri, Datuk Seri Najib Tun Razak dan bekas Ketua Pegawai Eksekutif 1MDB, Arul Kanda Kandasamy.

Hakim Mohamed Zaini Mazlan menetapkan 15 hingga 18 Jun, 27 hingga 30 Julai, 10 hingga 13 Ogos dan 24 hingga 26 Ogos untuk perbicaraan kes itu semasa sebutan di hadapannya hari ini.

Beliau turut mengingatkan pihak pendakwaan, yang diwakili Timbalan Pendakwa Raya, Rozaliana Zakaria dan Nadia Zulkefli supaya menyediakan pernyataan saksi sekurang-kurangnya seminggu sebelum tarikh perbicaraan.

Ditanya berapa orang saksi lagi yang akan dipanggil memberi keterangan, Rozaliana berkata lima saksi pendakwaan masih belum disoal balas oleh pihak pembelaan dan 20 saksi lagi akan dipanggil memberi keterangan.

Najib diwakili peguam Nur Syahirah Hanapiah sementara Arul Kanda diwakili peguam Datuk N Sivananthan.

Setakat ini, seramai tujuh saksi pendakwaan dipanggil memberi keterangan termasuk bekas Ketua Audit Negara, Tan Sri Ambrin Buang dan bekas Ketua Setiausaha Negara, Tan Sri Dr Ali Hamsa.

Najib, 67, didakwa menggunakan kedudukannya untuk mengarahkan pindaan dilakukan terhadap laporan akhir audit 1MDB sebelum dibentangkan kepada Jawatankuasa Kira-Kira Wang Negara (PAC) untuk mengelakkan sebarang tindakan diambil terhadapnya.

Manakala Arul Kanda didakwa bersubahat dengan Najib dalam membuat pindaan ke atas laporan itu, untuk melindungi Najib daripada dikenakan tindakan.

Kedua-dua mereka didakwa mengikut peruntukan Akta Suruhanjaya Pencegahan Rasuah Malaysia 2009 yang membawa hukuman maksimum penjara 20 tahun dan denda tidak kurang daripada lima kali ganda jumlah suapan atau RM10,000, yang mana lebih tinggi, jika sabit kesalahan

Bekas Perdana Menteri, Datuk Seri Najib Razak hadir di Mahkamah Tinggi Jenayah Kuala Lumpur untuk perbicaraan kes rasuah pengubahan wang haram dana 1MDB di Kompleks Mahkamah Kuala Lumpur.



Bekas Perdana Menteri, Datuk Seri Najib Razak di Mahkamah Tinggi Kuala Lumpur untuk perbicaraan kes rasuah dan pengubahan wang haram dana 1MDB.

11. Latar belakang rakan bapa Jho Low tidak diperiksa - Saksi

KUALA LUMPUR: Lembaga Pengarah 1Malaysia Development Berhad (1MDB) tidak pernah melakukan pemeriksaan latar belakang terhadap seorang pengarah bebasnya kerana individu berkenaan dilantik oleh Datuk Seri Najib Razak, Mahkamah Tinggi hari ini diberitahu.

Saksi pendakwaan kesembilan, Datuk Shahrol Azral Ibrahim Halmi, berkata nama Tan Sri Ong Gim Huat pada mulanya disebut oleh ahli perniagaan dalam buruan, Low Taek Jho atau lebih dikenali dengan nama Jho Low.

Mengikut laporan portal berita perniagaan yang dikemukakan oleh peguam Tan Sri Muhammad Shafee Abdullah kepada saksi, menunjukkan Gim Huat adalah sahabat dan rakan perniagaan kepada Tan Sri Larry Low Hock Peng, iaitu bapa Jho Low.

Saksi itu yang menjawab soalan peguam Muhammad Shafee pada sesi pemeriksaan balas, berkata bagaimanapun pelantikan pengarah hanya boleh dibuat oleh Najib selaku pemegang saham tunggal 1MDB melalui Menteri Kewangan Diperbadankan (MKD).

"Lembaga Pengarah bertanggungjawab untuk membuat keputusan yang betul, bagaimanapun hak untuk melantik adalah terletak di tangan Datuk Seri Najib.

"Saya tidak pernah melakukan proses ketekunan wajar (due diligence) terhadap Gim Huat kerana Datuk Seri mahukan beliau.

"Sepanjang menjadi CEO daripada tahun 2009 sehingga tahun 2013, Tan Sri Ong tidak pernah menunjukkan tanda bahawa beliau melihat kepada kepentingan lain, selain daripada kepentingan kepada syarikat," katanya.

Menjawab soalan Muhammad Shafee mengenai hubungan di antara Hock Peng dan Gim Huat, saksi itu berkata beliau tidak menyedari perhubungan antara kedua individu itu.

Muhammad Shafee kemudian mencadangkan kepada saksi, bahawa jika diperiksa latar belakang Gim Huat, akan mendedahkan bahawa beliau (Gim Huat) bukan 'bebas' sepenuhnya, sebaliknya seorang yang berpihak.

"Saya mencadangkan kepada kamu bahawa fakta mengenai hubungan ini menunjukkan bahawa Gim Huat tidak boleh menjadi pengarah bebas," katanya.

Shahrol Azral bagaimanapun menjawab, bahawa beliau tidak berada dalam kedudukan yang boleh memberikan komen mengenainya.

Sementara itu, saksi berkata beliau berat hati untuk mendedahkan dokumen usaha sama antara 1MDB-PetroSaudi International JV kepada Jawatankuasa Kira-Kira Wang Negara (PAC) kerana bimbang ia jatuh ke tangan pembangkang.

Shahrol Azral berkata, apabila dokumen sudah menjadi dokumen awam, pihak pembangkang boleh mengambil dan memilih apa yang hendak diberikan kepada media.

"Jika saya masih ingat, saya mendesak dokumen itu diberikan kepada PAC, dan kita perlu cuba untuk mematuhi sebaik mungkin, bagaimanapun ketika itu syarikat usaha sama sama tidak lagi dikawal oleh kita," katanya.

Shahrol Azral bagaimanapun tidak bersetuju dengan cadangan peguam bahawa dokumen itu akan mendedahkan beliau dan Jho Low serta beberapa pegawai kanan 1MDB lain berkonspirasi untuk menyeleweng berbilion dana 1MDB.

Perbicaraan di hadapan Hakim Collin Lawrence Sequerah bersambung esok.



12. Permohonan gantung perintah kembalikan RM194 juta kepada UMNO, MCA didengar 19 Jun

KUALA LUMPUR: Mahkamah Tinggi di sini menetapkan 19 Jun ini, untuk mendengar permohonan kerajaan bagi menggantung pelaksanaan perintah mahkamah yang menolak permohonannya melucutkan hak wang RM194 juta yang disita daripada UMNO, Wanita MCA dan dua syarikat.

Timbalan Pendakwa Raya, Mahadi Abdul Jumaat, memberitahu pemberita bahawa tarikh itu ditetapkan ketika pengurusan kes berkenaan hari ini yang berlangsung di hadapan Timbalan Pendaftar Mahkamah Tinggi, Catherine Nicholas.

Pendengaran permohonan itu pada asalnya ditetapkan pada 31 Mac di hadapan Hakim Mohamed Zaini Mazlan, namun tarikh tersebut itu dikosongkan susulan pelaksanaan Perintah Kawalan Pergerakan (PKP).

"Pendakwaan turut memfailkan rayuan terhadap keputusan mahkamah yang menolak permohonan pelucutan hak itu di Mahkamah Rayuan dalam bulan Februari," kata Mahadi.

Wang itu disita oleh Suruhanjaya Pencegahan Rasuah Malaysia kerana didakwa mempunyai kaitan dengan skandal penyelewengan dana 1Malaysia Development Berhad (1MDB).

Pada 7 Februari lalu, Mohamed Zaini menolak permohonan kerajaan untuk melucut hak wang RM194 juta yang disita daripada UMNO, Wanita MCA, Binsabi Sdn Bhd dan Perano Sdn Bhd.

Beliau membuat keputusan itu atas alasan bahawa wang tersebut tidak boleh dikatakan dengan yakin diterima daripada bekas Perdana Menteri, Datuk Seri Najib Tun Razak dan tiada keterangan membuktikan bahawa wang itu adalah daripada aktiviti haram.

Permohonan pelucutan hak terhadap UMNO membabitkan wang RM192,965,413.61 dan RM300,000 bagi Wanita MCA, manakala Perano, yang menjual hijab dan Binsabi yang membekalkan khemah, masing-masing sebanyak RM337,634.78 dan RM827,250 yang didakwa diterima daripada Najib.

Pendakwaan telah memfailkan permohonan pelucutan hak terhadap keempat-empat responden mengikut Akta Pencegahan Pengubahan Wang, Pencegahan Pembiayaan Keganasan dan Hasil Daripada Aktiviti Haram 2001.



Bekas Perdana Menteri, Datuk Seri Najib Razak hadir ke Kompleks Mahkamah Kuala Lumpur bagi perbicaraan kes rasuah dan pengubahan wang haram dana 1MDB.

13. 'Saya yakin 100 peratus dengan Jho Low'

KUALA LUMPUR: Bekas Ketua Pegawai Eksekutif 1Malaysia Development Berhad (1MDB) menaruh keyakinan penuh kepada Low Taek Jho atau Jho Low kerana ahli perniagaan dalam buruan itu mempunyai akses peribadi kepada Datuk Seri Najib Razak.

Datuk Shahrol Azral Ibrahim Halmi, 50, berkata ia juga berdasarkan kepada tingkah laku dan tindakan serta perangai kedua-dua individu itu apabila bersama.

Saksi pendakwaan kesembilan itu berkata, pernah pada satu ketika beliau memasak nasi goreng untuk Jho Low dan ahli perniagaan itu meminta beliau menyediakan hidangan sama untuk Najib.

Shahrol Azral yang menjawab soalan peguam Tan Sri Muhammad Shafee Abdullah pada sesi pemeriksaan balas, berkata Jho Low memberitahunya, Najib menyukai nasi goreng itu.

"Jho Low juga ada akses kepada rumah Najib di Taman Duta pada bila-bila masa dan beri nombor pembantu rumah kepada saya.

"Semua perkara dan kejadian ini menjadikan saya percaya bahawa Najib dan Jho Low adalah sangat rapat," katanya.

Bagaimanapun, Shahrol Azral berkata Najib tidak pernah memberitahunya secara peribadi bahawa nasi goreng itu amat sedap.

Pada ketika itu, pembantu kepada Muhammad Shafee dilihat menyerahkan nota kepada Muhammad Shafee.

Peguam itu berkata; "Pembantu saya baru menyerahkan nota yang menyatakan, dilihat kepada logik akal, mungkin Jho Low menghabiskan semua nasi goreng itu."

Shahrol Azral menjawab; "Mungkin juga, lain kali saya sediakan untuk anda (Muhammad Shafee) pula,".

Sementara itu, Shahrol Azral memberitahu mahkamah, pihak pengurusan 1MDB menganggap Petro Saudi International (PSI) yang menjalinkan usaha sama dengan syarikat pelaburan strategik negara itu sebagai menyakitkan hati dan menyusahkan.

Malah menurut saksi, projek PITA yang dijalankan oleh 1MDB bagi memperoleh semula dana daripada PSI, menjadi bahan lawak dalam kalangan pihak pengurusan syarikat.

Katanya, pengurusan 1MDB menamakan projek itu sebagai PITA kerana P dirujuk sebagai PSI manakala ITA (dalam bahasa Inggeris) bermaksud menyakitkan hati.

"Kami memanggilnya begitu kerana projek ini perlu ditangani dengan teliti kerana sensitiviti... kita tidak boleh teruskan hanya dengan berdasarkan keasas komersial.

"Dana ini adalah sensitif dan kami perlu uruskan dengan berhati-hati dengan merujuk kepada Najib," katanya.

Shahrol Azral berkata, Ahli Lembaga Pengarah 1MDB tidak mengetahui apa yang dimaksudkan dengan PITA.

Muhammad Shafee berkata, adalah mengejutkan kerana Lembaga Pengarah mungkin akan tertanya-tanya apakah yang dimaksudkan itu adalah roti, bagaimanapun saksi berkata perkara itu tidak pernah timbul.

Shahrol Azral sementara itu bersetuju dengan cadangan Muhammad Shafee bahawa tiada sebarang kertas kerja atau pembentangan mengenai Projek PITA kepada Lembaga Pengarah 1MDB.

Pada satu soalan lain, saksi bersetuju dengan peguam bahawa terdapat satu lagi projek dinamakan Magnolia, bagaimanapun tidak diketahui maksudnya kerana ia diberikan dan digunakan oleh Goldman Sachs.



14. Pengurusan tidak pernah lihat akaun PSOSL

KUALA LUMPUR: Pihak pengurusan dan Lembaga Pengarah 1Malaysia Development Berhad (1MDB) tidak pernah ditunjukkan dengan penyata kewangan atau penyata akaun teraudit Petrosaudi Oil Services Ltd (PSOSL) selepas pemerolehan saham dalam syarikat itu awal 2012.

Bekas Ketua Pegawai Eksekutif (CEO) 1MDB, Datuk Shahrol Azral Ibrahim Halmi, berkata perolehan saham berkenaan adalah sebahagian daripada proses pencairan Nota Murabaha 1MDB melalui syarikat usaha sama dengan PetroSaudi International (PSI).

Bagaimanapun katanya, ia dijual kepada Bridge Partners International Investments.

PSOSL adalah anak syarikat PSI

Menurut saksi pendakwaan kesembilan itu, penjualan 49 peratus saham 1MDB dalam PSOSL turut membabitkan peranan ahli perniagaan dalam buruan Low Taek Jho atau lebih dikenali dengan nama Jho Low dan peguam 1MDB Jasmine Loo.

Peguam Tan Sri Muhammad Shafee Abdullah kemudian mencadangkan kepada Shahrol Azral bahawa ia adalah penipuan oleh Jho Low, bagaimanapun ahli perniagaan itu tidak dapat menjalankan operasi sendirian, sebaliknya mendapat bantuan daripada saksi dan Loo.

Shahrol Azral bagaimanapun menafikan cadangan peguam itu.

Selanjutnya Muhammad Shafee mencadangkan bahawa Datuk Seri Najib Razak tidak mungkin terbabit dalam penipuan itu kerana beliau turut diperdayakan oleh Jho Low.

Katanya, Najib perlu meletakkan kepercayaan kepada pengurusan syarikat dan tidak boleh mengawal keseluruhan hal ehwal syarikat.

Saksi bagaimanapun menjawab, beliau tidak berada dalam kedudukan untuk mengulas apa yang diketahui dan tidak diketahui oleh Najib.

Sementara itu, Muhammad Shafee menyoal saksi mengenai pertukaran nama syarikat usaha sama 1MDB dan PSI iaitu 1MDB-PSI JV yang ditukar kepada PetroSaudi Holdings BVI.

Ditanya sama ada saksi memiliki salinan sijil yang menunjukkan ia adalah pertukaran nama bagi usaha sama dan bukannya bagi syarikat lain, Shahrol Azral menjawab, "Tidak ada."

Shahrol Azral berkata, beliau juga tidak pernah melihat sijil berkenaan.

Perbicaraan di hadapan Hakim Collin Lawrence Sequerah bersambung 4 Jun ini.

15. Gagal isytihar RM1 juta kepada LHDN, Shahrir Samad akan kemuka representasi

KUALA LUMPUR: Bekas Pengerusi FELDA, Tan Sri Shahrir Ab Samad akan mengemukakan representasi kepada Jabatan Peguam Negara berhubung pertuduhan gagal mengisyiharkan RM1 juta yang diterima daripada Datuk Seri Najib Razak kepada Lembaga Hasil Dalam Negeri (LHDN) yang dihadapinya.

Perkara itu dimaklumkan peguamnya, Syahrul Syazwan Salehin ketika pengurusan kes di hadapan Hakim Mahkamah Sesyen Azura Alwi hari ini.

Syahrul Syazwan berkata, pihaknya akan meneliti dokumen-dokumen berkaitan terlebih dahulu dan berbincang dengan anak guamnya berhubung permohonan representasi itu.

"Saya mengesahkan pihak pembelaan telah menerima semua dokumen berkenaan kes ini daripada pihak pendakwaan hari ini. Saya mohon mahkamah tetapkan tarikh baharu untuk pengurusan kes sebelum perbicaraan bermula," katanya.

Azura kemudian menetapkan 19 Ogos ini untuk pengurusan kes dan menetapkan tarikh perbicaraan selama sembilan hari bermula 12 hingga 15 Oktober, 9 hingga 12 November dan 3 Disember ini.

Timbalan Pendakwa Raya, Nor Diana Nor Azwa yang mewakili pendakwaan turut memaklumkan kepada mahkamah bahawa seramai sembilan saksi dijadualkan memberi keterangan dalam perbicaraan.

Shahrir, 71, dituduh membabitkan diri dalam pengubahan wang haram dengan cara tidak melaporkan pendapatan sebenar di dalam Borang Nyata Cukai Pendapatan bagi Tahun Taksiran 2013 yang bertentangan dengan Seksyen 113(1)(a) Akta Cukai Pendapatan 1967, iaitu tidak mengisyiharkan pendapatan yang diterima daripada bekas perdana menteri itu berjumlah RM1 juta melalui sekeping cek AmIslamic Bank Berhad bertarikh 27 November 2013.

Cek itu kemudiannya dimasukkan ke dalam akaun Public Islamic Bank milik tertuduh pada 28 November 2013.

Oleh itu, Shahrir didakwa sudah membabitkan diri secara langsung dalam transaksi yang membabitkan hasil daripada sesuatu aktiviti haram dan dituduh melakukan kesalahan di LHDN, Cawangan Duta, Kompleks Pejabat Kerajaan, Jalan Tuanku Abdul Halim di sini pada 25 April, 2014.

Pertuduhan ke atas beliau mengikut Seksyen 4(1) Akta Pencegahan Pengubahan Wang Haram dan Pencegahan Pembiayaan Keganasan 2001 yang memperuntukkan hukuman denda tidak melebihi RM5 juta atau penjara maksimum lima tahun atau kedua-duanya, jika sabit kesalahan.



Bekas Pengerusi FELDA, Tan Sri Shahrir Abdul Samad bersama peguam beliau Syahrul Shazwan Salihin (kanan) dan Fahmi Abd Moin (tengah) ketika hadir ke Mahkamah Sesyen Kuala Lumpur bagi pengurusan kes yang didakwa gagal mengisytiharkan RM1 juta kepada Lembaga Hasil Dalam Negeri (LHDN).



KETUA Audit Negara, Datuk Nik Azman Nik Abdul Majid

16. COVID-19: JAN sahkan memo

KUALA LUMPUR: Jabatan Audit Negara (JAN) mengesahkan memo yang tular di media sosial memaklumkan bahawa Ketua Audit Negara, Datuk Nik Azman Nik Abdul Majid disahkan positif COVID-19.

Dalam satu kenyataan, JAN memaklumkan memo itu dikeluarkan oleh Nik Azman untuk edaran dalaman dan bukan untuk dikongsikan dengan pihak luar.

"Tujuan memo itu dikeluarkan adalah bagi memastikan urusan pentadbiran di JAN berjalan lancar sepanjang ketiadaan Ketua Audit Negara.

"Sebab utama COVID-19 dinyatakan dalam memo itu adalah supaya tindakan dan langkah sewajarnya diambil dengan segera bagi membendung COVID-19 daripada menjangkiti warga JAN yang lain," jelas kenyataan itu, hari ini.

Selain mengesahkan beliau dijangkiti COVID-19, memo dikeluarkan oleh Nik Azman itu turut memaklumkan tugasnya akan dipertanggungjawabkan kepada Timbalan Ketua Audit Negara (Prestasi), berkuat kuasa semalam.

Tugas pengauditan kewangan dan tadbir urus akan dikendalikan Timbalan Ketua Audit Negara (Kewangan) dan Timbalan Ketua Audit Negara (Tadbir Urus), manakala tugas pengurusan pula dikendalikan Pengarah Sektor Pengurusan.

JAN memaklumkan, semua kontak rapat kepada Nik Azman sudah dimaklumkan semalam untuk tindakan lanjut.

"Bangunan di Blok F2 Kompleks F di Presint 1 yang terkesan telah melalui proses sanitasi dan nyah kuman semalam," katanya.

Memo itu tersebar selepas Pejabat Perdana Menteri semalam, memaklumkan Perdana Menteri, Tan Sri Muhyiddin Yassin, diarah menjalani kuarantin selama 14 hari di kediamannya bermula petang semalam.

Tindakan itu diambil selepas seorang pegawai yang hadir pada mesyuarat pasca-Kabinet di Pejabat Perdana Menteri Rabu lalu, disahkan positif COVID-19.

Perdana Menteri sudah menjalani ujian saringan COVID-19 pagi kelmarin dan disahkan negatif dan perlu menjalani kuarantin selaras Perintah Pengawasan dan Pemerhatian bagi Kontak COVID-19 (Seksyen 15(1) Akta 342).



17. Bekas pegawai bank dibicara berhubung pemindahan AS\$700 juta daripada 1MDB ke Jho Low

GENEVA: Mahkamah di sini, hari ini, memulakan prosiding perbicaraan pertamanya bagi mengetahui sama ada seorang pegawai bank tempatan gagal menghentikan pemindahan wang AS\$700 juta (RM3 bilion) ke dalam akaun dikawal ahli perniagaan dikehendaki, Low Taek Jho atau Jho Low.

Pegawai pematuhan, yang hanya dikenali sebagai A, adalah kakitangan di Coutts & Co, di mana Jho Low, mempunyai akaun di bank berkenaan, menurut Bloomberg.

Menurut pertuduhan, A, 52, adalah pegawai yang ditugaskan untuk melaporkan pengubahan wang haram di Coutts.

Skandal 1Malaysia Development Berhad (1MDB) yang membawa kepada kejatuhan bekas Perdana Menteri, Datuk Seri Najib Razak, berlaku selepas Jho Low membangunkan dana berjumlah AS\$8 bilion (RM35 bilion) bertujuan membangunkan ekonomi Malaysia.

Bagaimanapun, Jho Low didakwa mencuri wang itu dan membelanjakannya untuk pesta, pembelian kereta sport dan pembelian hartanah mewah serta pembiayaan filem "Wolf of Wall Street".

Jho Low kemudian mewujudkan syarikat Good Star yang berdaftar di Seychelles, pada Mei 2009 dan membuka akaun di Coutts Singapura, sebulan kemudian.

Menjelang September tahun sama, Jho Low memutuskan semua komunikasi dengan Coutts di Singapura dan hanya menerima kemaskini daripada Coutts di Switzerland menerusi e-mel chairman.goodstar@gmail.com.

Pihak pendakwaan Switzerland mendakwa A, kerana peranannya meluluskan pemindahan AS\$700 juta.

Menurut pertuduhan, pada 2 Oktober 2009, beliau menerusi e-mel meminta "sekatan terhadap akaun 11116073 Good Star Ltd dibuka. Usaha wajar setakat ini adalah bagus dan kita mempunyai bukti yang cukup bahawa pembayaran adalah sah dan betul.

Pihak pendakwaan berkata disebabkan perkara itu dan pelbagai kegagalan pematuhan, "kesalahan yang dilakukan A adalah sangat berat".



Bekas Perdana Menteri, Datuk Seri Najib Razak

18. Kes Najib: Pembelaan mula hujahan Isnin ini

KUALA LUMPUR: Pasukan pembelaan, yang mewakili bekas perdana menteri, Datuk Seri Najib Razak dalam kes SRC International Sdn Bhd, akan membuat penghujahan lisan terlebih dahulu apabila kes itu disambung semula di Mahkamah Tinggi, di sini, Isnin ini.

Hakim Mohd Nazlan Mohd Ghazali sebelum ini menetapkan tiga hari mulai 1 hingga 3 Jun ini untuk mendengar penghujahan lisan oleh kedua-dua pihak di akhir kes pembelaan.

"Ya, (saya berhujah dulu) dan berakhir dengan kami," kata peguam utama pasukan pembelaan, Tan Sri Muhammad Shafee Abdullah ketika dihubungi Bernama hari ini.

Timbalan Pendakwa Raya dilantik, Datuk V Sithambaram juga memberitahu Bernama bahawa beliau akan mengemukakan hujahan bagi pihak pendakwaan bagi mematahkan kes pembelaan.

Oleh itu, prosiding Isnin akan ini akan menyaksikan jawapan balas pihak pendakwaan terhadap hujahan pembelaan dan diakhiri dengan jawapan balas pihak pembelaan terhadap hujahan pendakwaan.

Pada 5 Mei lalu, Timbalan Pendakwa Raya, Muhammad Izzat Fauzan memberitahu Bernama bahawa pihak pembelaan telah mengemukakan 643 muka surat hujahan bertulis manakala pendakwaan mengemukakan 306 muka surat dan kedua-kedua pihak perlu membalsas hujahan tersebut.

Beliau turut berkata pendakwaan telah membahas 336 muka surat hujahan bertulis pembelaan manakala pembelaan membahas 446 muka surat.

Pada 11 Mac lalu, pihak pembelaan menutup kesnya selepas memanggil 19 saksi pada perbicaraan pembelaan yang berlangsung selama 33 hari sejak 3 Disember tahun lalu manakala pendakwaan memanggil 55 saksi sejak perbicaraan bermula 3 April tahun lalu.

Pada 11 November tahun lalu, Najib diarah membela diri atas tujuh tuduhan salah guna kuasa, pecah amanah dan pengubahan wang haram membabitkan dana RM42 juta milik SRC International.

Berhubung tuduhan pecah amanah, Najib, selaku penjawat awam dan ejen iaitu Perdana Menteri dan Menteri Kewangan serta Penasihat Emeritus SRC International didakwa melakukan pecah amanah jenayah terhadap wang masing-masing berjumlah RM27 juta dan RM5 juta daripada RM4 bilion milik SRC.

Dia didakwa melakukan kesalahan berkenaan di AmIslamic Bank Berhad, Bangunan AmBank Group dekat Jalan Raja Chulan di sini, antara 24 Disember hingga 29 Disember 2014.

Bagi kesalahan ketiga, Najib didakwa melakukan jenayah sama, membabitkan wang berjumlah RM10 juta, di tempat sama, antara 10 Februari hingga 2 Mac 2015.

Bagi semua tuduhan itu, Najib didakwa mengikut Seksyen 409, Kanun Keseksaan (Akta 574) yang jika sabit kesalahan boleh dikenakan hukuman penjara sehingga 20 tahun dengan sebatan serta boleh dikenakan denda.

Bagi tuduhan rasuah pula, Najib dengan kedudukan sama, didakwa menggunakan jawatan untuk suapan bagi dirinya berjumlah RM42 juta apabila mengambil bahagian atau terbabit dalam keputusan bagi pihak Kerajaan Malaysia untuk memberikan jaminan kerajaan bagi pinjaman berjumlah RM4 bilion daripada Kumpulan Wang Persaraan (Diperbadankan) kepada SRC International.

Dia didakwa melakukan kesalahan itu di Pejabat Perdana Menteri Presint 1, Putrajaya antara 17 Ogos 2011 hingga 8 Februari 2012 mengikut Seksyen 23 Akta Suruhanjaya Pencegahan Rasuah Malaysia (SPRM) (Akta 694).

Jika sabit kesalahan, boleh dihukum mengikut Seksyen 24 akta sama, maksimum 20 tahun penjara dan denda lima kali ganda jumlah atau nilai suapan atau RM10,000 mana yang lebih tinggi.

Bagi tiga pertuduhan pengubahan wang haram, Najib didakwa menerima wang berjumlah RM27 juta hasil daripada aktiviti haram melalui Sistem Pemindahan Dana dan Sekuriti Secara Elektronik Masa Nyata (RENTAS) ke dalam akaun miliknya di Bank AmIslamic.

Tertuduh didakwa melakukan perbuatan itu di Bank AmIslamic Berhad, Bangunan AmBank Group, No 55 Jalan Raja Chulan, dekat sini pada 26 Disember 2014.

Bagi tuduhan kedua dan ketiga, Najib didakwa menerima wang masing-masing berjumlah RM5 juta dan RM10 juta di tempat dan cara yang sama.

Kedua-dua perbuatan itu didakwa dilakukan pada 26 Disember 2014 dan 10 Februari 2015.

Bagi ketiga-tiga pertuduhan itu, beliau didakwa mengikut Seksyen 4 (1) (b) Akta Pencegahan Wang Haram, Pencegahan Pembiayaan Keganasan dan Hasil Daripada Aktiviti Haram (AMLATFA) 2001.

Jika sabit kesalahan, Najib boleh dikenakan hukuman penjara maksimum 15 tahun dan denda tidak kurang lima kali ganda dari nilai hasil aktiviti haram atau RM5 juta, atau mana-mana jumlah yang lebih tinggi.



19. COVID-19: Ujian saringan kontak rapat Ketua Audit Negara negatif

PUTRAJAYA: Keputusan ujian saringan COVID-19 ke atas semua kontak sangat rapat dan kontak rapat, kepada Ketua Audit Negara Datuk Nik Azman Nik Abdul Majid yang dijalankan pada 22 Mei, adalah negatif.

Jabatan Audit Negara (JAN) dalam kenyataan hari ini menyatakan, kontak sangat rapat seramai 10 orang itu merujuk kepada dua ahli keluarga dan lapan kakitangan di Pejabat Ketua Audit Negara.

Kesemua keputusan ujian saringan terhadap 34 pegawai JAN yang telah dikenal pasti sebagai kontak rapat kepada Ketua Audit Negara, termasuk tiga Timbalan Ketua Audit Negara juga negatif, kata jabatan itu.

"Bagaimanapun, berdasarkan Perintah Pengawasan dan Pemerhatian bagi Kontak COVID-19 (Seksyen 15(1) Akta 342), semua pegawai berkenan perlu menjalani kuarantin di rumah selama 14 hari," kata JAN mengenai status terkini kes COVID-19 di jabatan itu.

Mengenai keadaan kesihatan Nik Azman yang dikuarantin di Hospital Sungai Buloh sejak 21 Mei, JAN memaklumkan beliau telah menjalani dua ujian swab semasa dalam wad.

"Hasil kedua-dua ujian tersebut adalah negatif. Namun, berasaskan prosedur operasi standard (SOP) Kementerian Kesihatan (KKM), beliau masih perlu dikuarantin di hospital untuk tempoh tertentu," katanya.

Pada 23 Mei, JAN mengesahkan satu memo memaklumkan bahawa Ketua Audit Negara positif COVID-19 dan akan dikuarantin di hospital, yang tular, telah dikeluarkan oleh beliau sendiri.



20. Hujahan pembelaan kes SRC esok

KUALA LUMPUR: Mahkamah Tinggi esok akan mula mendengar hujahan pembelaan dalam kes pecah amanah, menyalahgunakan kedudukan dan pengubahan wang haram dana RM42 juta milik SRC International Sdn Bhd dihadapi bekas Perdana Menteri, Datuk Seri Najib Razak.

Hakim Mahkamah Tinggi Mohd Nazlan Mohd Ghazali menetapkan selama tiga hari bagi mendengar hujahan di akhir kes pembelaan itu.

Mahkamah sebelum ini menetapkan pada 18 hingga 20 Mei lalu bagi tarikh pendengaran, bagaimanapun melapangkan tarikh berkenaan selepas kerajaan menguatkuasakan Perintah Kawalan Pergerakan (PKP) di seluruh negara.

Prosiding akan bermula dengan pihak pembelaan mengemukakan hujahannya sebelum dibalas oleh pasukan pendakwaan dan diakhiri dengan hujahan balas pembelaan.

Pada 11 Mac lalu, pihak pembelaan menutup kesnya selepas memanggil 19 saksi untuk memberikan keterangan dalam prosiding yang berlangsung selama 33 hari bermula pada 3 Disember tahun lalu.

Selain Najib, antara saksi utama pembelaan lain ialah bekas Ketua Setiausaha Perbendaharaan Tan Sri Mohd Irwan Serigar Abdullah; bekas Menteri di Jabatan Perdana Menteri, Datuk Seri Jamil Khir Baharom; bekas Menteri Luar, Datuk Seri Anifah Aman; bekas Peguam Negara, Tan Sri Mohamed Apandi Ali; dan dua bekas Ketua Pesuruhjaya SPRM, Tan Sri Dzulkifli Ahmad dan Latheefa Koya.

Pada 11 November tahun lalu, Mohd Nazlan memerintahkan Najib membela diri terhadap tiga dakwaan pecah amanah jenayah (CBT), tiga pertuduhan pengubahan wang haram dan satu pertuduhan salah guna kuasa.

Najib didakwa pada 4 Julai tahun lalu atas tiga tuduhan pecah amanah dan satu tuduhan salah guna kuasa membabitkan dana SRC International berjumlah RM42 juta.

Pada 8 Ogos tahun lalu pula, beliau dituduh di Mahkamah Sesyen Kuala Lumpur atas tiga tuduhan pengubahan wang haram membabitkan jumlah dan dari dana sama.

Ahli Parlimen Pekan itu didakwa melakukan kesalahan terbabit antara 17 Ogos 2011 dan 2 Mac 2015.

Pendakwaan mengikut Seksyen 23 Akta SPRM 2009 dan sabit kesalahan boleh dihukum mengikut Seksyen 24 akta sama, iaitu penjara maksimum 20 tahun dan denda sehingga lima kali ganda nilai suapan atau RM10,000, atau mana yang lebih tinggi.

Pasukan pendakwaan diketuai Timbalan Pendakwa Raya ad-hoc Datuk V Sithambaram manakala peguam Tan Sri Muhammad Shafee Abdullah adalah peguam utama pihak pembelaan.